

■ Schneeweißchen & Rosenrot im Nonnehaisl zu Eimstock

Des Märchn vu die zwee Maadle is nu aa schu wieder Geschicht:

Am Tog dor Weiberfosnd war unner diesgähricher Voreinskarneval. Wie jedsmol gibt's e paarle, die nicht mit dare Aaputzerei ze tu ham wölln, aber die annern ham siech dodorfier viel Müh gabn un siech mit allerhand schenn Sachn rausgeputzt.

De Begrießing hat unnere Kerstin mit nern lustign Vürtroch gemeistert un glei emol Sekt auftischn lessn. Dar is vu de Geburtstich-Spendn-Galder rausgesprunge.

Mit lusticher Fosndmusik wurd gelei drauf aa schu de gute Asserei serviert un alle konntn siechs schmeckn lessn. Nochedam de Tisch wieder ogereimt warn, sei e paar vorschwundn, im siech in e paar altbekannte Märchnfigur'n ze vorwannln.

Vorne am Mikro stand su e Urenkl vu de Grimmschn Brüder un hat in den ihrn Auftroch wieder mol e Märchn weng imgewannelt.

Ims kurz ze dorklärn: Des Haisl vu dare Witwe un den schenn Maadn stand nu im Nonnehaislwald vu unnern Eimstock. De 2 gunge Maad warn viel in unnern Arzgebirgswald unnerwags, ham Reisich gesammelt, Beer gepflückt (un aa viel dorvu genascht), ham siech mit all den Getier draußn gut vortrogn un aa mannichs Liedl wie z.B vu „Unserer Heimat“ gesunge. Aa dorham warn se fleißich un ham ihrer Mam bei dor Hausarbit geholfn.

Immer „Wenn de Mam zen Simml gieht...“ ham se de Kich sauber gemacht.

Ach ja, do hattn se doch in Wald su e komischs Händie-Ding gefundn. Des war ganz unitzich for se un se hams glei fortgehaa, denn im Nonnehaosl gobs doch gar ka Innet!



Irgndwann in Winter hats dann mächtig an dor Tür gekloppt un e großer Bär kam rei. Dar durft – wies ja bekannt is – an Ufn schlofn un de Maad tatn ne Schnee aus sein Pelz kloppn. Im FrieHgahr is ar wieder vorschwundn, de Maad sei den Zwarg mit nern grußn Sack voller Gold begegnt un ham ne sein Bart beschnieln, dor Bär hat ne getatzt un dor Zauber war vu den Beedn wag: Dor Bär wurd e guter Maa, dar siech des Schneeweißl genumme hat un weil dar Maa gar ken Bruder hat, is dor Grimmsche Urenkl eigesprunge un hat siech des Rosenrot waggenschnappt. Dor Zwarg war aa nimmer bieß un do hat ne de Stadt Eimstock neine Bauhuf eigestellt, nu als wos? Nu halt als Gartnzwarg! Nooch dar vorworre MärchnGeschicht hat unner Lothar de weitere musikalische Unnermaling ieberrumme, e paar Musikwünsch un lustiche Liedle eigespielt.

De Karin, die schu währnd ne Märchn is Mikro hie un har trogn muß, hat aa noch ne klaane Bolonäs aagefiehrt, die is eweng kurz gewaasn, weil de Musik net lang genuch gereicht hat. Ansinstn hat e mannicher noch drauf gewart, des wie in den vorharign Gahrn e paar Büttredn oder annere Sachn zen Eisatz kame – aber des hat diesmol gefahlt. Trotzalledam wars wieder e ganz lusticher beschwingter Obnd mit Extra-Tanzeilogn un viel Spaß for allezam, kaaner wollt su richtig eham gieh, alle ham racht lang bei de fleißign Imbißleit an dor Vudlstroß ausgehalt!

Bis zer nächstn Fosnd 2027 – vielleicht wieder mit nern vorwannltn Grimmischn Märchn – e ganz harzlichs Glückauf vun Schmidti

